

通化縣志卷二

人民總序

善夫馬貴與先生之言曰古者戶口少而皆才智之人後世生齒繁而多窳惰之輩烏虜吾反覆誦公之言而不禁慄然以懼也夫等是人也古之人方其爲士則道問學及其爲農則力稼穡及其爲工商則懋遷有無及其爲兵則嫻戰陣投之所向無不如意此三代之民所以熙熙皞皞而無凍餒之患也若降至晚近則不然矣士拘於經義辭章而授以介冑則慙農安於隴畝而問之刀筆則廢商安於市廛而令之執戈矛則怯兵習於怠惰而使之守城則倍畔甚者謀不足以剪除姦兇而

通化縣志

卷二人民總序

一

奉天作新印刷局印

詐足以威揚禍福勇不足以鎮衛社稷而暴足以侵害閭里嗚呼古之所謂爲民者四今之所謂爲民者不知凡幾矣古之所謂農之家一者而今之食粟者不知凡幾矣古之所謂工之家一者而今之資焉者又不知凡幾矣是以生寡食衆用急爲舒遂致天不能養地不能長百物不能產而至於不可以爲生矣雖有上聖其若之何爲今之計欲厚民風而端趨嚮宜普及學校以固結人心嚴禁無秩序之平等無界說之自由並望鄉賢鄉紳之強有力者銳意於民德民風提倡忠孝以爲修身之本廣播節烈以爲齊家之源並宜將先賢先哲之嘉言懿行可歌可泣者妥爲講演

以資鼓勵庶幾水流溼火就燥一人向善輒千萬人亦與之俱爲善矣
雖然移風易俗類非俗吏之所能爲也世之關心民瘼者或不河漢余
言乎爰志人民首叙耆舊次叙科舉再次叙學校再次叙鄉宦再次叙
鄉賢再次叙鄉紳再次叙義勇再次叙節烈再次叙孝友再次叙公益
再次叙方技再次叙流寓再次叙自治再次叙戶口再次叙兵事再次
叙風俗再次叙宗教再次叙慈善再次叙僑民計分十九門都爲第二
卷

人物志

語曰十步之內必有芳草十室之邑必有忠信通化境屬白山綿亘佟水清漪其扶輿磅礴之氣山川鍾毓之靈自必有賢人君子淑女賢媛應運而出藉以維持風化砥礪士行焉惟我縣設治較晚文化未能普及僻佐山陬之民其庸言庸行可傳諸志乘而採訪尙有未及者爲不少矣是編所載耆舊鄉賢忠孝節義或本史乘之流傳或徵旌坊之實蹟其信而傳疑者不錄焉所望後之覽者念前人之懿行垂來禩之法戒務宜父詔兄勉家諭戶曉以嘉言懿行爲規範以服務社會爲天職庶幾風俗丕變人才蔚興則非特閭里之光抑亦邦家之榮也因以志

通化縣志

卷二 人民人物

三

奉天作新印刷局印

人物

人物志

耆舊

通化本屬遼東郡地舉凡秦漢以後遼東之人物即爲我邑之人物亦即我邑之鄉賢物望也爰於盛京通志採擇耆舊以資後人觀感

李久 遼東人漢安帝時海賊張伯路寇東萊爲青州刺史法雄所破逃還遼東久率鄉勇等共斬之遼地賴之以安

高詡 遼東人生於晉時善天文有權略因永嘉之亂避地隱居後爲郎中令又進爲元菟太守及皝破慕容仁復遼東欲盡坑其民詡諫止之

通化縣志

卷二 人民耆舊

四

奉天作新印刷局印

晁清 遼東人生於南北朝時襲伯爵戍守梁師攻圍糧盡城陷清抗節不屈後贈樂陵太守謚曰忠

高憲 遼東人生於金時天資穎悟博學強記爲博州防禦判官後遼陽城破死於難

高應詔 遼東人明時以指揮同知分防水冶鎮明末流賊東下應詔率兵連戰破之賊大舉入寇復拒之於倪村孤軍援絕遂戰死賊退民求得其屍葬鎮之東原

楊國柱 字廷石明時人籍屬遼東精騎射以功佩將軍印總宣鎮兵死於戰建祠歲祀額曰旌烈

王世泰 遼東人明崇禎時以歲貢知內邱寇掠西山弟世寧禦之戰死

李輔明 遼東人明時任山西總兵官罷歸戰歿於寧遠贈左都督列壇前屯衛祀之

李允升 遼東人順治六年以貢生知長子縣姜逆之亂其黨沈某夜半冒官兵入城允升被執不屈死之

吳國用 遼東人順治六年知霍印縣時陳伯紹倡亂擁衆入城國用揮刀躍馬率甲士巷戰力盡自刎贈按察司僉事廕一子

劉秉權 遼東人康熙七年巡撫廣東懲貪墨禁加派革供應風紀肅

通化縣志

卷二 人民耆舊

五

奉天作新印刷局印

然時方巡海展界秉權安插男女十六萬有奇墾田二萬五千餘項至復竈丁而鹽課足減屯賦而戍卒安重師儒而文風振皆治續之最著者也後以積勞卒於官

徐起元 遼東人明萬曆壬子舉人爲鄖陽巡撫適當闖賊之亂起元以秘計殺賊孤城獨完及清朝以功封太子太保卒謚僖靖

張文德 遼東人順治三年知垣曲縣刑清政簡潔己愛民卒於官士民感涕建祠祀之

科舉志

舉人

李祖培 字蔭滋縣西四區老把頭坎人也幼時讀書別有慧心師曾譽之曰此棟梁材也果於丁酉年舉於鄉後主長春黑龍江書院山長多年詩文雄邁書法圓潤

魁 斌 字文閣樣子哨人也書法平正惟淹貫經史爲文取法古文而不規規於時藝登甲午賢書

武舉

馮景山 有膂力善騎射頗有驍勇縣城人也

通化縣志

卷二人民科舉

六

奉天作新印刷局印

恩貢

王紹蘭 字甌臣縣城人也賦性忠誠治家有法

歲貢

張忠愛 字子博縣城人人極沈着性喜吟咏著有篁村詩集現已散軼

大學校畢業生志

蕭注雨 字宜民畢業於北京中國大學政治系充中俄交涉署辦事員

楊福第 北京中國大學畢業現充吉林陸軍整理處書記長

王國富 字育文北京朝陽大學法律專門畢業

袁常恩 字光彥畢業於北京中國大學政治系

楊金聲 字振之畢業於北京中國大學政治系

張國權 字偉民國立北京大學預科畢業

蘇 穉 字雨時現肄業北京中國大學文科

通 化 縣 志 卷二人民學校 七

奉天作新印刷局印

蘇 桐 字雨田現肄業北京中國大學法科

王永昌 字世五肄業北京工業大學

趙鴻儒 字笑菴曾肄業於東北大學英文系現充奉海鐵路站務員

黃成喜 字雨三曾肄業於東北大學理工系現充奉海鐵站務員

孔憲雙 字斌然現肄業於東北大學政治系

韋延智 字仲達肄業於東北大學英文系

王鳳林 字瑞森東北大學英文系肄業

周世富 字經九現肄業於東北大學理工系

許寶麟 字玉軒現肄業於北京中國大學法律專門部

留學生志

王恒顯 字君謨畢業於日本東京工業大學

陳士瀛 字仙洲畢業於日本仙台高等工業專門學校電氣部

李德海 字靖清現肄業於日本東京商科大學銀行系

楊福元 字少松現肄業於日本東京商科大學預科

高等師範及專門畢業生志

韓 英 字紫珊北洋高等師範數理化科畢業曾充各高級中學數

學教員

趙煥超 字騰霄北洋高等師範史地科畢業曾充安東縣道立中學

通 化 縣 志

卷二人民學校

八

奉天作新印刷局印

學監

趙祥雲 字鵬超北京高等師範畢業

金殿桂 字友石奉天文學專修科畢業

高振武 字鏡寰奉天公立法政專門學校畢業

李春仁 字子沛奉天私立體育專門學校畢業

師範畢業生志

李鎮華 字曉峯奉天兩級師範本科畢業歷充通化縣高等小學校

教員縣立中學校教員縣教育會會長勸學所所長教育公所所

長縣志編查館館長

高品古 字洗凡奉天省立師範畢業歷充高等小學校教員縣立第四小學校校長桓仁營口等縣縣視學現任通化縣教育公所所長

宋棟臣 字維邦奉天省立師範畢業歷充高小學校教員現任教育公所事務員

于化周 字蔭棠畢業於奉天省立第一師範畢業後膺縣立初級中學校數理教員嗣升教育公所事務員

郭景華 字子陽畢業於奉天省立第一師範現任通化初級中學校教員

通化縣志

卷二人民學校

九

奉天作新印刷局印

馬清川 字文泉畢業於奉天省立第一師範畢業後曾充通化第一第五縣立小學校教員現任通化縣立初級中學校數理教員

溫成貴 字品一畢業於奉天省立第一師範現任第二高小學校教員

崔玉璋 字石璞畢業於奉天省立第一師範現任通化初級中學校教員

高品秀 字韻松畢業於鳳凰城省立第二師範現肄業於師範英文專修科

劉寶鐸 字警遙省立第二師範畢業現升教育公所事務員

王輔漢 字志三省立第二師範畢業歷充各高小教員縣立第五小學校校長

舊制中學校畢業生志

張錫純 字味一奉天附屬中學校畢業曾充縣教育會會長高中學校教員現任通化縣女子師範講習科教員

李鳳彩 字雲五奉天附屬中學畢業

宮潤章 字憲斌通化舊制中學校畢業曾充高中學校教員通化師範講習科初級中學校校長

閻鼎銘 字新三通化舊制中學校畢業曾充高中學校教員現任縣

通化縣志

卷二人民學校

十

奉天作新印刷局印

立第四小學校校長

楊培武 字育文通化舊制中學校畢業曾充縣教育會會長高小教員現任縣立第一小學校兼市立第四小學校校長

趙永清 字鏡波通化舊制中學校畢業曾充教育會會長高小教員
民治七區區長

張寶玉 字太璞通化中學校畢業歷充高小學校教員縣立第五小學校校長現任通化初級中學校訓育主任

張益文 字友三通化舊制中學校畢業現任桓仁師範暨初級中學校英文教員

張兆文 字鑄秋通化舊制中學校畢業現任縣立第三小學校校長

趙春浦 字南濱通化舊制中學校畢業現任縣立第四小學校教員

魏韞珊 字鐵岩舊制中學校畢業

南秉鈞 字子衡

盧勝莠 字式之

郎玉山 字鑒青

林棟梁 字任之

隋孝先 字顯揚

趙永明 字文久

通化縣志

卷二人民學校

十一

奉天作新印刷局印

黃忠俊 字子元

趙永廉 字潔忱奉天省立第四中學畢業嗣入稅務傳習所畢業後

充海城縣騰鰲堡稅捐分局主任

李慶和 字樂亭通化中學畢業

藍興華 字振夏通化舊制中學畢業

任漢文 字倬雲

毛嘉言 字子謇

周紹綱 字文軒

遲發祥 字紫真

楊福扈 字潤生

于化南 字召棠

張忠謀 字紹周

朱文耀 字聚五

潘玉堃 字敬輿

杜小康 字普三又字宜民

線雙齡 字夢九

金殿榮 字麗青

遲德潤 字雨塵

通化縣志

卷二人民學校

十二

奉天作新印刷局印

張玉珍 字瑞琴

江鎮洲 字耀五

陳廣全 字嘉謨

李樹峯 字雲岐

以上均係舊制通化中學校畢業此係十五年份以前之調查

于淑貞 字斌俠

蕭淑雲 字迺銘

郭玉璋 字獻麒

備考（以上三名均係奉天省立女子師範學校畢業其他簡易師範及師範講習科之男女畢業因在學制上係補習性質故不錄）

鄉宦志

王蘭香 字岱峯通化六區三棵榆樹人也弱冠後憤吾國政事秕謬乃矢志東渡入日本宏文書院肄業畢業後歷充通化高等小學校教員縣立中學校教員縣教育會會長縣教育公所所長奉天省議會第三屆改選君膺議員之選嗣蒙省憲委任爲牛海稅捐局局長一任數年清風兩袖迄今海邑人民猶嘖嘖盛道云

高振武 字鏡寰族名品顯縣南五區大川村人也少慕任俠喜交游奉天法政學校畢業歷充鐵嶺審判廳書記官台安縣承審西豐縣司法公署審判官東三省兵工廠辦事員陸軍第八師師部軍

通化縣志

卷二 人民鄉宦 十三

奉天作新印刷局印

法處長甄用法律專科甲等內務部自治講習所學員前程未可量也

曲雲漢 三區人也初投巡防爲哨長嗣爲黑龍江督軍署科員陸軍教練官現充魯軍團長

田福堂 以字行業醫有年現充熱河都統公署軍醫官

王恒顯 字君謨縣東三區四道江人也少有大志倜儻不羣弱冠留學東瀛工業大學對於地質採鑛特別注意畢業後蒙前熱河都統闕公子珍垂青遂電調委爲熱河財政廳科長

線松喬 字彭年精明幹練北洋警務畢業曾充吳淞烟台長春各埠

警察署長現任濟南警廳督察長

魏 鑫 字質真本縣一區人也短小精悍慷慨過人幼時讀書長充
教員嗣投戎幕現充陸軍二十師部秘書處長

張發昌 字福亭初爲商人營業頗盛嗣因故投軍現充直魯聯軍第
九軍司令諮議等官

陳士瀛 字仙洲幼時穎異富於研究性有清末造充縣立高小教員
嗣因所學不足致用乃負笈至東瀛肄業仙台高等工業三年畢
後現充市政公所電氣課課員哈爾濱電業公司科長

董輔廷 以字行原籍海城現充陸軍三十八旅長治軍甚嚴因駐紮
通 化 縣 志 卷二人民鄉宦 十四
縣城置有家產於此矣

由寶善 字督藩石棚村人也由陸軍大學校卒業後充黑龍江軍署
科員連長熱河騎兵團長

劉懋德 字化一三棵榆樹村人也保定軍官畢業曾充陸軍部諮議
團附營長京漢路局長

鄭福祥 字席珊富於膽識驍有勇力少好佩刀劍喜乘良馬及長入
行伍曾充陸軍連長副官警察區官因勞績卓著得有官勳在案
南口之役沒於軍可慨也夫

趙玉順 字荊山其先世覺羅人也學術優長經驗宏富好讀兵書頗

得軍心現充東北陸軍營長

胡名臣 字鐵藩邑附生也人極聰明學業優長於前清考職佐雜分往直隸候補民國元年署直隸深澤縣知事後充總統府政治顧問北京大學校長惜天不假年卒於差次否則前途成就未可量也

仇振名 字化南通化留學東洋之第一人也卒業於日本警監學校歷充安奉鐵路分局局長奉天警察廳偵緝員通化第四區區官第三屆省議員

邵連勝 字仲三精明強幹老成練達初爲巡防營管帶駐防縣城二十餘年置有田產因家焉平素治軍保民頗有聲譽現任東北陸軍三十五團團長

韓 英 字芝珊縣城人也天質聰穎學問純正尤精數理化學畢業於北洋師範學堂歷充籌邊蒙文中學師範各校教席訓育主任等職察哈爾都統署科員奉天兵工廠會計科員

王振國 縣三區人也志向遠大少年老成畢業於中學即投筆從戎復入陸軍講武堂因學術兩科俱優現充東北陸軍三四方面軍團部團長代理旅長

鄉賢志

孫作新 字子振通化教育先進也人極誠悃作事認真幼家貧公無力購書恒爲人傭書得所值則以購書弱冠設帳義塾循循善誘言行身化學者宗之有清末造百政更新公應地方人士之請曾任地方捐務處主任二年涓滴歸公絲耗不紊任學務總董三年不辭勞怨成績頗優曾任團練處幫辦訓練團防保障閭閻商民迄今稱之嗣因年老力衰又長高初兩等小學校校務者五年長女子小學校兼女子師範講習科者十有二年計前後宣勞教育界中者廿有餘載以積勞致疾歲乙丑（民國十四年）以疾卒於

學校各界臨喪追悼多行弟子禮聞者以爲榮惟公一生艱苦毫無積蓄含殮之日苦無以爲葬幸經地方士紳邵公緯宸李公曉峯陳公銘三連合各團體蠲醵始得安葬昔人謂鄉先生沒而可祭於社者其先生之謂歟其先生之謂歟

鄉紳志

田洪祥 字豐亭縣諸生以勤儉起家教育子姪不寬不嚴而子姓均整飭自勉當通化初闢時諸政待舉公蒙地方人民之請辦理鄉團清釐會務秩序井井人無間言晚年優游鄉里對父老則論家庭教育遇子弟則示以孝悌大節且喜爲人排難解紛對於地面事情急公好義年七十二無病而卒

楊文山 字雅亭縣城人也胸襟曠怡品學均優曾在縣署戶房充差但清白自矢毫無遺行晚年家居專事生產故公在城內市房甚多長子福培次子福厚季子福元均有異材

通化縣志

卷二 人民鄉紳

十七

奉天作新印刷局印

趙步瀛 字少青學業純正器識宏深少年事父母至孝壯歲曾蒙地方人士之請歷任高等小學校校長教育會會長教育公所所長縣立中學校校長熱心學務屢蒙上峯嘉許民國十三年夏辭職又蒙監督袁荐委第四區區長古道熱腸一時無兩洵不愧一鄉之善士

邵芳齡 字緯宸縣西旺文川人也人極剛毅作事老練幼而孤公以授徒謀養事母至孝嗣經潘茂蓀知事下車伊始即敦聘佐治公誼不容辭遂出而動勦行政臂助潘公若左右手溯公自膺聘後即與潘公謀設學校改良警甲清釐地方捐務裁汰鄉會積弊修

理義倉平治道路犖犖大端規劃井然並兼任地方公款主任聯任五次於地方事務多排難解紛甯人息事之舉而對於岐黃尤特別擅長每日求診治病者應接不暇但無論親疏貧富一視同仁竭力調治多才多藝公眞通化之俊傑也

陳樹勳 字銘三賦性鯁鯁饒有膽識對於地方公益事務頗能認真辦理曾充恭梓鄉議事會副議長農會會長而於鄉民訴訟事件每多方調和不辭勞怨人亦以此敬重之

趙鴻恩 字錫三本邑城內人也持躬清正遇事和平惟對於子姪格外嚴重而子姪持躬均有先生風闔門之內亦異常雍睦遇有事

通化縣志

卷二人民鄉紳

十八

奉天作新印刷局印

故必開家庭會議衆表決後然後行之故潘茂蓀知通化事時有通化家庭教育以趙君錫三爲最之譽非虛語也君子永廉稅務傳習所畢業猶子永清永明均縣中學畢業一門慈孝內外藹然若先生者可以風矣現充農會會長

李德新 字耀三縣西四區三合堡村人性行誠樸勤儉自持治家有法教授諸生亦熱心任事歷充高等小學校教員現任通化縣立第二小學校校長雖年近耳順猶精神矍鑠熱心服務云

徐炳南 字煥章人極正直曾充縣議事會議員教育會會長縣立第一高等小學校校長辦理頗有成績晚近家居專攻岐黃診脉立

方有獨到之處遇有紛難之事亦喜爲人排解

王國翰 字秉範通化縣議事會議長也持躬率真性好友愛對於鄉里有紛爭者經公解決均唯唯遵從而無後言故區長任滿之後鄉人爲送衆望攸歸匾額以頌其功德且能誘掖後進如留京學生袁常恩學膳等費皆君所慨施也

張明珍 字聘之辦理學務能任勞怨通化初辦鄉學時君充勸學員風氣不開人民多不令子弟入校君苦口勸導強迫施行寬猛並濟鄉學得以發展君之力也

姜耀德 字魁武以行伍起家充靖邊營管帶駐紮縣城十餘年保護通化縣 志 卷二人民鄉紳 十九 商民頗有功德現已年屆古稀頽然一鄉老也

吳丕璽 字玉軒通化二道江人也居心正直作事大方以農起家現已至小康矣但公自奉簡約非有賓客則食無肉非往來酬酢則不衣帛公曾充縣農會會長區長總甲長等職近家居不聞世事但以耕讀兩般課子爲業有古人樂天知命之風焉

袁慶三 字祥九通化四區金斗火烙村人也賦性任俠見義勇爲生平慕魯仲連之爲人喜排難解紛遇貧困者輒傾囊相助且喜爲人擔負債務事以此受累現家中落有子常恩現畢業北京中國大學次子常恕現任小學教授均能承父志衆謂袁氏有子矣

曲綿祚 字錫三縣庠生也幼時讀書兀兀不倦及長曾任縣義塾教授啟迪有方學者宗之晚近家居以詩酒自樂但已置世事於不顧矣曾一膺鄉老之選

李鎮華 字曉峯通化教育界之山斗也爲人恢豁大度和藹可親畢業於奉天兩級師範初級本科歷充高中學校教員縣教育會會長教育公所所長當公之長教育也通化風氣未開教育設施多有未善公乃不辭勞怨整理學田以裕學款建築鄉校以謀普及取締私塾以培真才嚴別優劣以資鼓勵計前後十有五年滿城桃李郁郁菁菁公之力也民國十五年夏任滿調省時縣長李公東垣以縣志總纂相敦聘公辭弗獲遂與同寅手造名山事業近來燕居喜爲文闡揚先達或書格言以獎寵後進對於地方公益亦多方贊助洵士林中不可多得之人也

劉維翰 字文閣縣城人也爲人樸實作事認真曾充電話局長

閻光元 字雲亭性任俠喜交遊曾在軍警兩界充差有年云

李振坤 字在田能爲人解紛爭捐已地作義塚曾充商團長農會長
徐德春 字景芳快大茂子村人也人極正直辦事真切曾充鄉議員

農務會會長三區區長現在家居務農勤儉持身頗孚鄉望

宋竹筠 字雅臣寬栗鄉人也慷慨好義熱心公益曾充農會會長鄉

議會議長前膺奉天鄉老會議時能陳時弊有一鳴驚人之概

解起雲 字秀岩直隸甯河人也幼隨父來通理商業二十年來經營有道創設大通當商業儲蓄會電燈公司等實業連任商務會長至十餘年之久歷辦公益事務尤爲出力

馬秉信 字景援人極直爽在鄉里間爲人排難解紛不避嫌怨歷充學董區長辦理公務又極認真

楊式平 字子均敏樹鄉人也性豪雋好交遊歷充鄉董議長區長對於地方事務辦理真切不避嫌怨因德望孚衆曾被舉爲鄉老二
次云

通化縣志

卷二人民鄉紳 二十一

奉天作新印刷局印

張寶森 字書橋人頗直率作事認真曾充巡官股員教養工廠廠長等職

江存清 字鑑齋性慷慨而俠義處事公正待人誠懇辦理警甲勦捕賊匪能名久著通化地方之保障也（餘詳警甲志）

張明瑤 字子珩二區人也精明強幹奉天兩級師範學校修業生因助理家兄操辦事務而輟學遂經理商業因而致富曾充二區區長捐助自己領名地爲學校校舍其熱心公益可見一斑矣

婁殿臣 字委卿三棵榆樹人也忠厚和平頗孚鄉望爲第六區區長辦事尤爲公正對於學務更具熱心

于成章 字煥文江口村人也曾充參事員鄉會副議長警察所總務
股員人既爽快辦事尤爲公正云

李政富 字潤廷東升村人也曾充鄉董副議長學董等職創辦學校
不遺餘力若八里哨小荒溝閘枝溝等處學校均經君手創設而
成者也

楊福堃 字子厚幼讀書長經商自治成立君被舉爲城廂議長自治
講員小學教員民元爲臨時省議會議員人極精明建白亦多通
化警甲使用之槍彈君爲議員時所購置也

張慶濤 字海樓二道江人也人極誠實幼爲人傭書勤儉以致富因
通化縣志 卷二人民鄉紳 二十二
辦事公正被舉爲鄉董區長等職現雖家居猶充農會紳董也

于輔臣 字績廷惠柳鄉人也因爲人正直被舉爲鄉董收捐董事及
助理員清賦委員農會評議員云

張九卿 字欽棟哈密河人也度量寬宏辦事穩健對於家庭兄弟間
怡怡如也現充八區區長

曲宗亮 字允普精明和厚老成練達曾充艚船會會長商事公斷處
長商界之中堅份子也

高成業 字建堂畢業於自治研究所社會教育講習會人極和平長
於理財對於公益事務亦能認真辦理現被舉爲艚船會長農會

調查員各職

李鳳陽 字偉青師範畢業後入奉天憲政講習所紳班肄業考列第一名入登記講習所亦列前茅充農業學校國民學校教員管理教授均稱合法充勸學員至十年之久辦理各鄉學務毅力熱心屢蒙嘉獎因孚衆望被舉爲第四屆省議會議員

戰慶吉 字寶山熱心公益見義勇爲曾將自己領地捐作山東同鄉會善營地并捐修警察保甲各駐所之公地歷充艚船會長商會會長辦理會務甚爲認真

楊春 字景三商界之健全份子也老成持重事理通達曾充城廂通化縣志 卷二人民鄉紳 二十三 奉天作新印刷局印
議事會副議長商會副總理多年云

鄧福臻 字慕陳爲人直率辦事認真歷充警察股員區官等職

白增祿 字庫臣喜交遊重然諾誠樸勤儉擔任商會副總理及會董辦理公務極爲熱誠周到也

劉學海 字作舟忠厚純正農商爲業被舉爲惠柳鄉學董自治會議長辦理地方事務人稱正直云

蕭大光 字維煥創辦女學甘盡義務經理十餘年頗有成績

義勇志

張明璠 通化三區恭梓鄉人也父希寬當偽忠義軍之亂閭閻騷擾民不得安公倡辦團練殉於難明璠尚氣節有父風歲甲寅濛匪王登瀛等陷撫松擾臨境警團東出星夜赴援匪乘虛擾縣境明璠擊却之歲乙卯欒匪陷桓仁圖東竄與我警團戰不利折回輯安聚四百人之全力撲小羅圈溝彼馬我步馳救不及明璠力戰三小時卒以兵力單子藥罄歿於陣父子忠勇父老爭傳之

張丙南 縣城人也短小善戰歲甲寅濛匪王登瀛等攻陷撫松竄縣境爲故紳張明璠區官鄭福祥擊滅殆盡餘匪脅衆復攻臨江丙

通化縣志

卷二人民義勇 二十四

奉天作新印刷局印

南隨警務長江存清保衛團辦事員趙德喜馳救臨屬三岔子陸防各軍陸續東上幾二千人丙南等奉令防北甫馳抵匪亦踵至冒險痛擊馘匪三十餘人逐北五百餘里論功任保衛第一團團總歲乙卯欒匪陷桓仁擾輯安竄縣境張明璠陣亡丙南復隨趙德喜馳救匪已北度江丙南攀深林涉危崖出賊前幾獲欒匪適丙南中彈亡得逸去德喜撫丙南屍哭之慟軍心益奮裹創再戰卒擊退之現丙南已從祀忠烈祠

劉永貴 恭梓鄉人也人極勇敢任保衛第二團團總調查戶口盤詰奸宄爲全境最民國五年六月殷德明等受匪首雙紅煽惑黨羽

數十人擾我撓頭溝永貴率團丁斃匪五人因兵少力單嗣中彈
亡現已從祀忠烈祠

俞寶仁 直隸人僞忠義軍率衆破城城中兵單知縣陳璋棄城遁入
民間寶仁力守死於賊

張祥和 直隸人作事勇敢不畏強禦在通化時任典史嗣因監犯越
獄親往彈壓中彈死

房星吉 山東人霸匪高殿橋黨羽百十人屢擾柳河南竄縣境星吉
帶警不滿十人手格霸匪中彈亡現從祀忠烈祠

田新政 字又橫縣城人也少慕田橫之爲人有大志倜儻不羣當幼

通化縣志

卷二人民義勇 二十五

奉天作新印刷局印

齡時與羣兒戲曾折草爲旌旂疊石爲營壘鄉老見者奇之及由
高小畢業學識益進惟值清政不綱諸凡解紐君目擊心傷乃隻
身赴奉入某新聞社爲記者對於時論臧否言之過激遂觸當局
之忌又以組織革命與南省通遂被殺臨刑之日神色不變迄今
猶有能道其事者

何武魁 直隸滄縣人住縣屬信禾鄉快大茂子街以營商爲生有商
人徐棠蔭儘所有購金砂赴省貿易中途失去惶急萬狀武魁拾
得詢明還之

節烈志

王孫氏 邑人王金之妻也自二十一歲出聘至二十七歲其夫病故僅生一子年方五歲翁姑去世伯叔分居零丁孤苦毫無所倚氏乃競競業業不畏艱辛以教養其子至於成立現年已六十五矣當由地方士紳具情請予褒揚蒙大總統頒賜節勵松筠匾額一方遠近稱之

費王氏 縣屬恭梓鄉小羅圈溝住戶費俊德之妻也秉性嫻淑舉止莊重自二十三歲于歸至二十七而夫作古僅生一子甫四月家極寒微翁姑春秋已高家無恒產生計維艱賴氏柏舟自守井臼親操上事翁姑下撫弱息三十年如一日現子喜春業已成立能迪祖武則夫人訓導之力也

倪羅氏 縣城北關居民倪起發之妻也自十七于歸倪門孝事翁姑人無間言洎二十九而夫故遺子文德文煥二人彼時文德年纔九齡文煥尙在襁褓素乏縵麻之親僅有薄田數畝家計蕭條困苦難言氏乃井臼親操借針黹以度日晝荻丸熊教二子以成人現年已七十計四十年之中茹苦含辛松柏自勵洵巾幗中不可多得之人也

修秦氏 縣民修正先之妻現教育公所事務員修祿之母也氏自十

七歲于歸修門孝事翁姑克盡婦職洎二十九歲而夫故時翁姑去世伯叔分居家無錙銖之積室乏斗石之儲而遺子長方六齡次在襁褓氏乃井臼親操薪水自任計三十餘年茹苦含辛而無異志現二子均已成立丕振家聲皆節婦有以啓之也現經地方士紳呈請褒揚蒙省長莫頒賜節操冰心匾額一方白綬銀質褒章一座婦女聞之均奉爲師表云

張高氏 張維栢之母爲海城義士高際五之女幼適襄平張殿元之子玉恩十七于歸伉儷甚篤四年而夫夭折上奉翁姑下撫子女家貧親老百感勞心張母處之晏如也未幾二親相繼棄世家無

通化縣志

卷二 人民節烈 二十七

奉天作新印刷局印

他人煢煢孤苦親友中多有代爲戚戚者張母聞之曰蘇裙雖破世不變色以兒女見之熟也海枯石爛志莫予奪柏舟之操瀾臻其固子名維栢即其母之所命以紀實也最拂意者家無立錐地外無應門人近友至親亦莫敢常相通問仰持母家以育兒女民國二年其父際五先生挈眷移通母子三人因求附載由此身居母家即相依爲命矣瞬息十四年女嫁子亦成人乃獨立門戶置薄田數畝於崗山麓因以爲家焉張系之不斬爲張母之節孝有以致之耳予爲其父執立知其事之最詳欽挹之心最殷久欲表揚而維時尚早茲聞張母年已將及五旬例合請旌幸值縣志告

成豈可再爲湮沒將來節孝門中當增一陪席者矣

胡田氏 名潔岩字奇峯縣紳田豐亭之女邑人胡名臣之妻也幼嫻女誠性行淑均年二十一于歸胡氏上孝翁姑下和妯娌閭里稱之嗣翁姑相繼逝世伯叔分居家遽中落氏夫胡名臣就食四方渺無音信氏乃入女學讀書晝夜不輟三年學成而氏夫以某有力之援引出宰直隸深澤縣知事氏聞知之前往時夫已納小星寵之椒房矣氏到官廨後遇之無禮氏知不能容隨夫宦遊一載返通以課徒營養翌年夫歿時氏年三十有四柏心自矢對於教肅亦頗熱心閭里稱之

通化縣志

卷二人民節烈 二十八

奉天作新印刷局印

張王氏 縣屬龍頭村張仁德之母復縣王君貴之女也生有淑德年十七聘張士喜爲室次年生子仁德又逾二年而夫出外謀生一去渺漫永無音驛伯兄令氏改嫁並謂氏曰青春守節白首全真自古迄今能有幾人况人言紛紛均謂士喜已故吾家夙貧賤汝盍早爲計氏謂伯曰傳聞之言不可信也假令夫死氏即改嫁將何以對張氏之祖宗耶伯噤不敢再言嗣設種種逼迫手段氏始終不渝計氏自二十一歲冰心自持迄今享壽八十猶異常強健所謂作善天降之庥其婦人之謂乎子仁德有孝行善承母志孫二曾孫二均循循守夫人訓現家境已小康矣

楊王氏 縣城楊永春之妻也夫青年病故氏頓失所天慟不欲生遂七日不食卒以身殉地方團體嘉其節烈請旌表之

伯蓀曰自世運閉塞人心嶮巇曠觀朝野置忠孝節義於不講也久矣矧通化僻在邊陲設治較晚者哉雖然松柏不彫於歲寒鷄鳴不已於風雨當此衆昏之日固未嘗無獨醒之人也茲特將父老傳聞事實可徵者勒爲節烈志非敢鋪張揄美亦以假高風亮節用以使懦立頑廉云爾惟編纂之時限於時間採訪多有未及尙祈

邦人君子閨門淑媛有以諒我焉

瀋陽後學孟伯蓀謹識

孝友志

趙椿芳 城內人也母年古稀既耄且病晨夕孝養湯藥親嘗母歿哀毀骨立年逾六十年節奉祀尙復號泣如失恃初

南景林 字芝山縣城南關人也幼孤事母至孝凡出必告反必面家事鉅細必質諸母而後行之君性嗜酒母恐其酒多過量至於敗德曾誡之曰酒不可飲也君恪遵母命雖宴會酬酢亦不飲酒現舉家慈孝人皆稱之

劉永清 縣西四區快大帽子人也母王氏年古稀臥病在牀公焚香默祝曰倘令母氏痊愈矢終身不茹葷翌日母病愈現母春秋已

通化縣志 卷二 人民孝友 三十
八十君敬謹侍俸始終不懈

王玉 城廂人也幼失怙恃弟琳尙存襁褓中撫之成人爲之授室自置財產析半授之同居數十年友愛之情始終若一

羅福順 城廂人也父母早世携弟福堂自原籍東魯來居縣城南門外教以工藝俾得成人典史王毓仁贈以匾額曰友于可風鄉里榮之

沈國卿 縣屬龍頭人也性至孝母病親視湯藥衣不解帶及事繼母亦如生母繼母臥病三年君菽水承歡揣繼母之喜慍以爲欣戚母沒君慟哭失聲年節俸祀惟謹故鄉老稱之

公益志

戰慶吉 字寶山現任通化商會會長也以商致富樂善好施民國初通化客籍商旅多死無營葬地公曾施捨義地六畝爲客籍人掩葬之所又因君祖籍山東而山東人之來通多無團體機關以聯絡感情公遂組織山東同鄉會於南關壩壕外繼又創設慈善會組織慈善小學校歲丁卯春山東全境罹於兵災多流離東來嗷嗷待哺公惻然傷之乃商諸縣長李公東垣及士紳等組織難民旅館每日施捨粥飯遇疾病者爲之請醫調治故人皆稱之

楊璽海 縣城東十字街人也世業農以資雄性好施予當仁不讓當

通化縣志

卷二人民公益 三十一

奉天作新印刷局印

通化創立救貧所時公助洋一百元縣南大廟溝向無校址公施捨校地六畝農會向無的欸公將上喇蛄河自己良田施捨六天與農會西大橋爲往來要道修理時公施洋二百元修東大橋時又施洋一百元今春救濟難民會成立公又慨施大洋五百元監督李公東垣嘉其慈善特贈匾額一方現遠近均呼之爲楊善人云

蕭沛霖 縣城北關人曾慨施北山警察分駐所一處計地共二畝蒙前任監督袁頌賜匾額一方曰急公好義云

方伎志

朱培善 字寶亭原籍鳳凰城君弱冠移居通城天資英敏精於楷書行書晚年書法遒勁游筆如龍以作字爲樂事凡有求者雖山林野老公亦必敬謹應之而無懈弛之態是以遠近宗之

李增瑞 字子祥古晉陽人也幼慕班定遠張騫之爲人父命之入學讀書君應曰書本斷爛之朝報不足學劍乃萬人敵竊願學焉遂棄書學劍三年精於劍術且長於形意拳弱冠後因家貧無以爲養乃孤身來奉經同鄉某介紹入某銀號學商賈三年辭賬來桓仁通化兩縣擬謀生產以所謀不協貨殖窶空值民國六七年教育廳有添設武術之令君遂膺通化縣中學校縣立第一小學校警察教練所武術之選任事以來誠以教授課餘之暇力謀漢碑近來書法卓然自成一家若李君者可謂困而能學矣

吳金鐸 字木軒興京旺清門人也幼時崇拜基督稍長入興京教會讀書後考入奉天醫科大學畢業後在通組織通化醫院醫理精深診療得法開設以來活人無算且爲貧者施治恒不取分文春秋兩季施種牛痘兩次對於地方公益事宜每竭力提倡洵醫界中不可多得之人也

李樹南 字明湖縣諸生也人極瀟灑工於書法圓潤純熟頗近李海

峯惟神力不及近來城內各石印局名刺匾額多出其手將來好自爲之其書法之進境不可量也

程慶春 字東閣體格魁偉幼好任俠嗣從師習武術刀槍嫻熟身手敏活其行也有龍行虎步之勢其立也有官止神行之容故城內人士均以武術大家呼之慕秋兩知縣令均委以衛隊長之差嗣因破獲巨匪有功擢升一二區區官歷任十年清風兩袖人民自今稱之

徐炳南 字煥章通化西都嶺人也曾長縣立第一小學校校務十餘年成績頗著公晚歲精於岐黃婦孺科尤特別擅長故通化人士

通化縣志

卷二人民方伎 三十三

奉天作新印刷局印

經公起死回生者不可勝數（餘詳鄉紳欄）

洪錫恩 字向宸通化東二道江人也君性謹慎喜勤儉幼業醫及長設寶源堂於城內內科熟練用藥小心謹慎而獲效頗速居心淡泊不慕榮利不憂貧賤亦通化城內奇人也

勾永仙 別號樂天道人幼時冲穎奇嶷及長逃於禪堂不顧塵世山林獨坐冥然於繪事其所繪山水蘭菊有名於時惜不自愛重且無有力者爲之表揚故湮沒不彰現已不知所終矣

胡名山 字筱川縣城人也幼極聰穎所讀之書過目即了嗣留心繪事其筆法短小精悍情景逼真其佳作爲三秋圖及各種動物栩

栩欲活惜晚年家境式微生計咄人君遂束之高閣而無心於繪
事矣有子名寶德亦工小楷古人謂明德之後必有達人其公之
謂歟

流寓志

李塞翁 原名文藻字曉雲別號陸沉子一字笑雲清光緒二十六年經欽命東邊礦務總辦阮毓昌保荐辦理通柘臨柳輯五縣鑛務值忠義軍肇亂奪其良馬因改名塞翁祖籍浙江自君父移居吉林君少時倜儻聰穎異常人所讀之書過目成誦惟詩文別有性靈不規於章句作此不利場屋後遂投筆參贊戎幕多年自辦理東邊礦務遂從而家焉民國改元君關懷故國即蓄髮爲道人裝性嗜酒喜交遊晚年宦囊羞澀家徒壁立偶值賓客滿座則令老妻脫簪珥治酒漿盤壘間未嘗有儉色以此人益欽之晚年好學喜參禪書並有看花癖茅舍三間花木滿院有五柳先生洒然風趣其忘年友瀋陽孟伯蓀曾贈以詩云三徑猶存新事業一生未改舊風流讀此詩可以知公之天真矣公晚近著有蛛隱廬詩文集各一卷說疫摘要四卷晚無子亦無期功強近之親但樂天知命學以忘憂現年七十有四猶精神矍鑠手足強健洵可謂亂世之隱士也

徐潤章 字冠堂山東海陽人也幼家貧性嗜學恒兀兀不息長游四方歷覽名山大川詩文因之雄壯宣統元年至盤山曾任高等小學校校長遂與前熱河都統闕公子珍有神契民國三四年任奉

天省立第一第四中學國文教員民國七年任通化縣師範講習科縣立中學校國文教員公教授諸生言行身化循循善誘通化學子凡經公口講指畫者爲文章悉有法度可觀現在縣西都嶺置有良田百畝有勸公出而謀事者公曰我有薄田足以供饘粥茅屋可以避風雨箸書立說我之志也舍此自然之樂而謀意外之榮非我之志也民國十四年秋中學校宮校長以國文教職乏人曾聘公教授師範級國文客秋縣志編查館成立李公曉峯又聘公編纂縣志現公退然一老隱於山林山色水光詩懷酒興有瀟灑出塵之概洵晚近不可多得之人也

孟昭明 字子融山東莒人也爲人恢豁大度公直廉戇幼因家貧未得深造弱冠後負笈來奉天設教於撫順驛馬站興京通化等處講解明晰教管合法故授業於公之門而以文章顯者頗不乏人公晚年教子耕田課孫讀書屈指十年家境小康其長於經濟有非腐儒所可比擬矣現寓縣東二道江對於地面公益等事竭力圖之而子孝孫賢一門和睦洵不愧東魯家風也

呂繹斯 字巽亭山東蓬萊人也精於金石專工篆書且喜繪博古詩文亦清淡自民國二年君來通設塾於三道江四道江等處人極古樸有純儒風邇來年近知命尤自強不息每日日出看書摩帖外

別無他好飲食亦簡約非有客至不具酒肉惟架上喜購奇書每日往來酬酢均有日記如先生者可風也

別金相 字士如山東海陽人也精於輿地性喜吟咏箸有木石居士集一卷公自民國三年來通任第三高等小學校教職現以生齒日繁遂從而家焉公性古鯁與人落落寡歡但遇吟咏之士或道德中人則必折節下之必令人人各如其意而後已公現任城內第一小學校教職鱣堂坐困文字無靈吾不禁爲公不遇悲矣

陳廷森 字幼山浙江紹興人也幼學申韓長從軍旅曾充某營管帶官因關心實業遂棄功名如敝屣乃來通化鐵廠子地方創設復

通化縣志

卷二 人民流寓 三十七

奉天作新印刷局印

泰公司開採煤礦獲利無算君身體魁偉性情慷慨而瀟灑遇有貧困之人尤能救濟之而無德色現已年至古稀而精神猶壯健也

陳克揚 字繩武遼陽人也作事果敢有爲交友重信義然不主濫交因先人在通置有荒地故流寓於此從事開墾焉初任鄉學教員繼升城立二校校長復注重實業開設惠通工廠兼業農商終老
林泉云

自治志

前清宣統二年奉天全省自治籌備處通飭各縣創設城鎮鄉地方自治會令於六月十五日一體成立我邑劃分全境爲六區曰城廂曰恭梓鄉曰寬栗鄉曰信禾鄉曰敏樹鄉曰惠柳鄉城廂議事會選舉議員二十名董事會選舉總董一名董事一名名譽董事四名其五鄉議事會每鄉選舉議員名額列後鄉董佐各一名均於是年六月組織完全同時成立創辦之初已有基礎人民知識遂漸開通議董各會員皆能認真作事於地方應興應革極力進行大有文明進化之勢民國三年忽然奉令停止雖云曇花一現而議決與執行各案皆與人民造福不

通化縣志

卷二人民自治 三十八

奉天作新印刷局印

尠他年自治復活應以此次爲先河往事可志作自治表

會 別員 名姓名員額 備

考

縣議事會議 長王國翰

副議長李玉珍

議員 一〇

縣參事會參事員王松山

參事員邵芳齡

參事員趙 馨

參事員于成章 于成章辭職王裕國以備補參事員遞選

王裕國

城廂議事會議

長邵芳齡

邵芳齡選縣參事員楊福堃以副議長

楊福堃

楊福堃選省議員楊春以副議長選議長

楊春

副議長楊福堃

楊福堃選議長楊春以議員選副議長

楊春

楊春選議長楊雅亭以議員選副議長

楊雅亭

議員一八

城廂董事會總

董王玉

王玉辭職以白景元選總董

通化縣志

卷二人民自治 三十九

奉天作新印刷局印

白景元

董事羅福堂

名譽董事邱瑞亭

邢子衡

毛肇濱

周齡

恭梓鄉自治會議長張慶餘

張慶餘辭職以陳樹勛選議長

陳樹勛

副議長張明珍

張明珍辭職以明玉田選充

趙玉田 趙玉田期滿改選張福星

張福星

議員 一六

鄉 董李時雲

鄉 佐駱殿有 駱殿有任滿改選張慶濤

張慶濤

寬栗鄉自治會議長宋竹筠

副議長于成章

議員 八

通化縣志

卷二人民自治 四十

奉天作新印刷局印

鄉 董王吉興

鄉 佐林長清 林長清任滿改選潘文緒

潘文緒

信禾鄉自治會議長徐德春

副議長姜鳳周

議員 一〇

鄉 董蕭廣源

鄉 佐趙錫福 趙錫福任滿改選袁明山

袁明山

敏樹鄉自治會議長楊式平

副議長于富治

議員 八

鄉 董裴萬林

鄉 佐劉紹堂

惠柳鄉自治會議長王樹風 王樹風任滿改 學海

劉學海

副議長王連貴 王連貴病故遞選李政富

李政富

通化縣志

卷二人民自治 四十一

奉天作新印刷局印

議員 一〇

鄉 董王明珠

鄉 佐于輔臣 于輔臣任滿改選張義芳

張義芳

省議會議員 楊福堃 第一屆

王蘭香 第二屆

李鳳陽 第四屆

仇振名

戶口志

人民爲國家要素生聚尤治國要圖我國人數爲列國冠土地開拓人民即隨其開拓而麇集通化設治雖未久客籍之遷入人家之添丁於今較昔實有三十年加倍之勢周禮地官掌民策各邑書民數於版獻於大司徒人數之重自古爲昭孔子所以有負版之式近年全境劃八區區長調察精詳無略漢人最多旗籍融於內韓僑回教爲最少數僧道傳教士尤少總計二十三萬餘向後生殖之繁日增月盛人滿之患不卜可知僅就現狀以志戶口

通化縣全境戶口表 民國十六年份調查

區別	戶數	男		女		口備考
		丁	口	丁	口	
第一區	六千五百七十八戶	二萬五千零二十三丁	一萬五千零九十五口			
第二區	四千五百五十四戶	一萬七千一百一十二丁	一萬一千零八十四口			
第三區	五千六百八十二戶	二萬零一百二十八丁	一萬三千五百四十八口			
第四區	四千零六十六戶	一萬五千一百九十六丁	一萬二千一百二十一丁			
第五區	五千一百三十九戶	一萬九千一百零八丁	一萬三千八百七十五口			
第六區	五千六百二十一戶	一萬八千六百九十三丁	一萬三千一百九十五口			
第七區	三千六百四十一戶	一萬三千五百五十二丁	八千五百八十二口			
第八區	四千一百六十四戶	一萬三千六百二十三丁	八千三百六十七口			
合計	三萬九千四百四十五戶	十四萬二千四百三十三丁	九萬五千八百六十七口			
統計	全境男女共二十三萬八千三百丁口					

通化縣

志

卷二人民戶口 四十三

奉天作新印刷局印

韓僑戶口表 民國十六年份調查

區別	戶數	男	丁	女	口
第一區	一百零八	四百三十	三百三十四		
第二區	四十二	八十八	七十八		
第三區	一百八十一	四百三十三	二百九十九		
第四區	六百八十六	二千零二十四	一千七百八十八		
第五區	五百二十四	一千八百三十八	一千四百六十四		
第六區	二百六十八	八百零一	六百四十八		
第七區	四十四	一百三十	一百一十六		
第八區	五十九	一百九十二	一百五十二		
統共	一千九百一十二戶	男 五千九百三十六	女口 四千八百七十九		

通化縣志

卷二 人民戶口 四十五

奉天作新印刷局印

兵事志

通化地處邊徼東望老嶺西跨康刪南俯佟江北倚龍崗山河環繞地勢險仄此固歷代用兵東陲必爭之地也秦漢以前文獻無徵姑弗深考曹魏之際毋邱儉討高麗絕沃沮千里至肅慎南界是爲縣境用兵之始厥後隋開皇大業間則有遼東王入寇宇文述會師之役唐貞觀總章間則有太宗親征高麗薛仁貴進兵鴨江之舉宋眞宗大中祥符七年則有契丹蕭迪里攻伐高麗之事明萬歷四十四年則有清兵破滅烏拉輝發之戰千餘年來東事之煩蓋無代無之然皆爭攘一隅於中國大局無關也逮清末造拳匪禍作僞忠義軍佔據縣城知縣陳璋

通化縣志

卷二人民兵事 四十六

奉天作新印刷局印

導俄兵至引虎入室而禍變始劇矣及至甲辰日俄失和縣境淪爲戰場政府幾費躊躇義烈併命夫婦橫死千年奇禍更無如此之創鉅痛深者也嗚呼十年以還時機大變內而劇盜視我如砧上肉外而強鄰待我如釜中魚禍福之機間不容髮謀一不臧庚子甲辰之往事可爲寒心當局諸公尙其慎哉謹記曹魏迄清所歷兵革使後之人有所考焉

魏 毋邱儉討高麗絕沃沮千餘里至肅慎南界沃沮即今之窩集又

名哈湯毋邱進師之道史弗詳魏默深注沿渾江即佟佳江 泚水即鴨綠江

舊在縣境今歸臨江輯安二縣以進蓋是時朱蒙之裔方振勢泚水南岸毋邱追

勦敗軍至此是爲中國用兵鴨渾兩江見於史乘之始

隋 開皇十八年遼東王師靺鞨萬餘人靺鞨古肅慎地舊在縣境今劃歸輯安縣境矣寇

遼西尋謝罪罷大業八年煬帝遣宇文述等九人會於鴨綠江西七戰皆捷高麗遣使詐降述軍士還至鴨綠江潰九年煬帝自擊破之高麗降

唐 貞觀十七年新羅以百濟與高麗連兵謀絕其入朝之路來乞兵十八年詔親征以李世勣爲遼東大總管率步騎出遼東二十一年太宗以牛進達李世勣爲遼東大總管率步騎伐高麗二十八年薛萬徹斬其渠帥還龍翔元年高宗使任雅相等伐高麗泉蓋

蘇文遣其子率精兵數萬守鴨綠江湖兵契苾何力至適冰合引衆涉水銳進高麗大潰總章元年李世勣拔新城行軍管記有不
知守鴨綠江之檄高麗悟移兵據之唐兵不得渡左武衛將軍薛
仁貴與高麗戰大破之諸軍合進鴨綠柵高麗平因分設九都督
府置安東都護於平壤命仁貴檢校安東都護總兵二萬鎮撫之
毋邱雖渡涓水煬帝雖降高麗並未派員率兵永遠駐守至是鴨
渾兩江之西各縣始完全歸中國轄

宋 眞宗大中祥符七年契丹以鴨綠江逼近高麗高麗築六城契丹遣蕭迪里討之敗還高麗遣使朝宋趙宋以前中國多事東道阻

塞垂百餘年至是鴨綠江以西復通

明 正統以前專事防倭故成梁姚大節楊鎬等築六堡破三柵用全力於遼寬甸間縣境晏然無兵事垂二百載萬曆時清顯祖以地內附邊吏貪功執殺之撫鎮匿不上聞清太祖日與弟兄秣馬厲兵爲復仇計三十四年貢後遂以勒索軍糧爲名屢進兵於開元境並東北進師力謀擴充疆宇是時葉赫烏拉猶強欲攻取野人衛不得不沿渾江上游由東北進師縣境遂爲用武之地萬曆四十四年明四路援師敗於撫順清太祖克鐵嶺開原兩衛葉赫之後援已絕未幾即亡扈倫四部蒙古三部長白山二部合兵三萬

通

化 縣

志

卷二人民兵事

四十八

奉天作新印刷局印

侵清太祖逆擊破之斬首四千級獲馬三萬匹擒烏拉貝勒之地布占泰軍威大振乘勝逐北輝發烏拉哈達先後殲滅葉赫等部未亡之前縣境歲有兵事葉赫等部既亡之後縣境無兵事之可言

清 順治定都燕京劃旺清門以外東至長白山爲禁地設台兵巡守不准樵採游牧咸豐年間撤台弛禁游民漸集同治十二年大廟溝卯丁互爭利權爲居民害名曰金匪崇將軍實檄在提督寶貴平之設局丈地並設治焉光緒二十年清日失和日兵進逼寬甸各縣商民避難縣境黃知事毓森督衆守禦民皆勇義幸賴以安

歲庚子夏五月拳匪禍作積匪劉彈子擁衆數萬僞稱忠義軍到處擄掠知縣陳璋編制通字營會同鄉團禦之六道溝戰不利鄉團猶圖再戰陳先已棄城遁通字營潰鄉團各歸本鄉自保縣城遂陷於賊會省垣方與俄議和無暇東顧爲賊巢窟一年有餘俞典史寶仁恥陳之遁督率鄉團力守孤城冀圖恢復適米知縣種赴任屢犯險卒無功越一年陳璋導俄兵至賊未能淨滅俞轉被迫行至馬鹿溝死之縣境復沒於賊是年五月俄合兵團擊破僞忠義軍劉彈子遁吉林延吉崗其徒張桂林林七降於俄（劉彈子本吉林唐殿榮部下殿榮精槍法日蒐其部訓練之人人有命

通

化 縣

志

卷二人民兵事

四十九

奉天作新印刷局印

中技專劫掠俄人在吉林界從不滋擾殿榮嘗隻身入俄境適俄兵野操殿榮伏草間俄兵方樹候較操殿榮自後遽發槍俄兵應聲仆俄兵猶謂誤拔槍機或自傷殿榮連放四槍仆四人俄兵始大呼有賊窮搜草間殿榮左右手各挾二槍見俄兵來四槍並發絡繹不絕俄兵連仆數十人始狂竄殿榮乃徐出草間搜其槍枝捆載而還將軍長順聞之遣使招撫殿榮率衆三萬投降派統領官劉彈子與其同夥十四閻王爭營官晨入殿榮帳乘其未起拔刀刺之殿榮傷雖重猶力縛彈子有餘裕念其共事久釋之去殿榮亡彈子乃入僞忠義軍迄今吉林省人猶感頌殿榮不置猶恨

其不手刃彈子留以害我通化耳）歲甲辰日俄之戰俄既敗於日復大至攻入城迫秋知事桐孚北行至柳河縣屬釋回日隊踵至立糧台設電線以縣境爲前敵支路八月俄軍來自八道江與日戰於城東商民日處槍林彈雨中猶復戀戀不去愛國心重故也越日俄北退日亦撤糧臺去電線振旅西行是役也民遵政府中立命令始終不渝然其飽受蹂躪迄今耆老言之猶復色變心悸

風俗志

周禮山國澤國因其地管子丘陵泉源殊其性禮王制凡居民材廣谷大川異制民生其間者異俗剛柔輕重遲速異齊是知一山一水一鄉一邑自有其風俗也風俗因乎地利故語云百里不同風千里不同俗通巖邑也其東陞之山國乎山林甫啟之時物饒土沃內省流寓携家而來者齊魯之民最多其次幽燕其次晉豫而土著居其少數五方雜處言語不同嗜欲不達衣服飲食沿習故鄉複雜亦已甚矣且其人有漢滿耶回之種族其禮有冠昏喪祭之習慣家襲祖風人安故俗各從類別不可易其宜也當其絡繹而來鳩處山間就地板屋家不成村播

通化縣志

卷二 人民風俗 五十一

奉天作新印刷局印

穀墾荒一洩榛莽積土之膏腴時則伐木雲屯納禾露積渾渾乎雄富風也獨惜其衣食於目前只圖得地而不知樹木久遠之計耳自林盡火畊而山窮矣自水蕩沙壓而土瘠矣昔之開山以贍身家買地以長子孫而視爲膏壤者今則懼爲石田或又轉而之他邦矣其始也人鮮知書農多而商少男勤耕穫女務爨炊家有客民鄉無匪警雖氣習强悍則北風也務稼穡重詩書士民醇樸觀風問俗共目爲新陸海爲小桃源近年來而風俗又一變矣山國之交通不便也商賈因之賤貨而來滿載而去以故人趨逐末日尙奢華物質之文明未進而生活之程度已高耕者終歲勤勞之所入只足供國家地方之度支也以故農思

遷地土樂充兵莫計備荒鮮思儲蓄時勢遷流則佟江上游水土淺薄民氣輕浮地利然也此亦鼎變而後新舊過渡所必經之階級也然吾聞風俗與化移易政教實風俗之樞機也凋敝如漢初未幾而治稱文景據亂如隋末未幾而史美貞觀此猶天下計也至於一隅蕞爾蜀人僿而愚文翁何以成雅化渤海飢而盜龔遂何以興歌謠則知移風易俗政教一轉移間耳而况吾通化林業礦產美利猶如此其富也閭塾黨庠學校猶如此其盛也警甲鎮撫盜賊潛銷食德服疇猶是邊地樂土也今民生雖困習尙縱非昔比較之蜀與渤海猶大相徑庭主持政教果能因勢利導與地方團體相勗自治安見不仁風美俗而爲模範

通化縣志

卷二 人民風俗 五十二

奉天作新印刷局印

縣哉謹志風俗略陳如左

農功 天寒地凍春融較遲東作之期宜芒種後施肥用草根畜糞每歲冬季積成方堆上蓋土泥使之內燒去其熱性春初翻動用器攪和先以牛馬騾犁鬆地土再將肥料颺灑地面春雨後三四日一律播種未雨則土燥種不播芽甫雨則土黏苗不出土播種後薙草三次旱澇任諸天運不知用人力補救阡陌之形庠水之具悉未設備種以豆爲大宗次黍次粟次玉蜀黍次稻次麥五穀畢備因土質礆薄間數歲必易種否則所獲不豐春耕遲似防農事夏日滋長極速秋季收穫並不後時若嚴霜不早降即闔境慶有

年蓋地氣爲天寒所壓抑鬱久則發洩速理固自然也新穀既收堆置隙地天寒地凍始入場俗謂之打凍場除食用外或車載或船艚運大都售之安東農無家不飼豬備平時變價歲臘自食牛羊鷄鴨亦多喂養惟不嗜鴨放牛者曰牛管放豬者曰豬管趕羊

羊管餘均倣此僱募者多農功簡約人能種地三十畝尙有人少地多之病輒僱用新到客民僱全年者辛工需銀元四十餘元僱數月者辛工需銀元四五元農忙時則僱散工日需銀元三四角糧米不甚愛惜山溝各小戶新來客民到處皆可寄食菜蔬種類極多城市名曰菜園四鄉則候農功畢留隙地以種之

商務 商多燕人次則魯籍本省本縣則寥寥無幾家故其舖規仍沿用燕魯舊習學徒初至先奉侍執事人暇習商兼習寫算終日正立滿三年後始准有坐股實商舖多用外櫃歲居省垣及繁盛商埠購辦貨物運回銷售以交通不便每年封地後必預算全年能銷售貨物盡數運齊不足則隨時添購之鄉民多不識字需要物品每不知應赴何舖購求故數年前商必將所有各貨陳設門外以廣招徠又以天氣苦寒早晚無事閉門靜坐近則風氣漸開競修巨舍外必蔭蔽以大門鄉民亦知入內購貨天甫明門即啓夜將半門始閉商務分會設在本城東大街懼日午開會防礙交易

也故非要事會議多在晚間重年節必宴會同事多日富厚舖戶宰豬至十餘隻他品稱之舊歷年底爲普通帳期有入城償還者下鄉收取者三年結帳一次所獲紅利除去公積金按額定錢股即資身股即傭本家均分本年度結帳無不獲利三倍商務發達有一日千里之勢焉

婚嫁 俗好早婚子未成年父母已爲之授室文定伊始其姑嫜或約女友親至媳家俗謂之裝煙盖猶沿滿風焉聘禮極隆多或千金少亦百兩知禮之族尙知力矯其非結婚之前一日即設筵宴客正日尤盛大率每菜八簋每席六客有多至數百席者屋小不能

通化縣志

卷二 人民風俗 五十四

奉天作新印刷局印

容多客因在院內搭蘆蓆棚苟遇雨期泥濘淋漓客則逃席禮分優渥或送金器或送銀幣司帳人事後決算出入數目絀少盈多青輿至門先休止門外以**稀**篩置輿頂然後迓入拜天地新婦初以紅綢蔽面至洞房外始揭去戶盖以馬鞍新婦由鞍上跨過徧設地衣俾新婦足不履土旣入房盤坐炕上俗謂之坐帳坐罷起裝裝罷出房行覲見禮有長輩必裝烟後一日宴女親名曰上拜婚禮始成文明結婚雖已實行然絕無而僅有矣

喪葬 喪禮簡約衣衾不備棺槨不厚弔客不多與婚嫁適成反比例未大斂先送廟俗曰送漿水又曰送盤費又曰送搭連三日殯曰

送三七日殯曰送七深葬者少浮屠者多蓋縣皆異籍人爲後日扶靈回鄉計也擇日開弔擇地安葬必出自有力之家至百日則大舉或焚紙紮各品或延僧道誦經至三年更大舉或收親友禮分或設筵席酬客今學校普及民智漸開有重喪儀而減婚嫁費者亦社會改進之一端也

祭祀 設治未久舊族不多故皆譜牒未修家廟未立每逢年節類皆設祭於室舊本信神如土地廟財神廟山神廟龍王廟娘娘廟胡三太爺廟有事必祭山溝小戶輒於屋旁地隙修一木廟高祇二三尺以祭以禱必敬必誠今則破除迷信不載祀典之廟鮮有祭者風氣漸開教育之功效也

巫醫 鄉人病多信巫不信醫俗名曰跳大神鉦鼓喧闐香火薰灼病者固多妨害不病者亦礙衛生陋俗也自查禁嚴學校立鄉人迷信逐漸破除行醫之人類皆附居藥舖亦有背藥囊入山溝代人診治兼銷售藥品者

飲食 上農之家五穀悉備間數日易一飯最足以助加餐中農以下食其所有而以玉蜀黍爲大宗經商者則常食蜀黍伐木者則常食粟米粳稻麥粉非有事鮮食者旅舍供客饅首居多雖有上中下三等之分然其區別在菜蔬不在飯米性嗜酒飲輒醉以能禦

寒故代名詞曰水棉襖居常不食肉豆茄瓜菜皆可佐盤殮然其
多每使勝食氣渴則飲水泉雖嚴寒不知改夏日畏熱飯既熟激
以涼水則又合飲食爲一事矣遇年節必宰猪前數日裹水角凍
使堅盛以筐饑則熟食之食肉必盡量留猪首備舊歷二月二日
之用鷄以糧食多飼養肥客至即割頗有殺鷄爲黍古風觀其平
素日食似儉然統計全年比較內省所費已超越數倍矣

服飾 俗尙樸素雖巨紳富戶亦御布衣鄉民必足履靴鞞爲山溝環
繞便於行走故也婦女出門鮮有飾金珠衣絲綢敷脂粉者

屋宇 邑多森林樑棟之取求較易山溝小戶因無磚窰架木塗泥便

通 化 縣 志

卷二 人民風俗 五十六

奉天作新印刷局印

作牆壁四週或圍以木板或樹以柳條門高且寬便大車出入間
量深濶院落空廠屋頂則多蓋苫草屋內則對修土炕有屋五楹
並不間隔父子姑媳主僕雖多至十數人已敷居住雖爲防盜賊
禦寒冷起見而徧越規矩之事即多由此而生富戶大家則分內
外縣城較鄉爲勝然除公署公所外草房仍多於瓦房近亦逐漸
拆修改草爲瓦且有建高樓者

器具 種類頗多擇其要者列左（甲）耙犁柳邊紀略載奴爾干管地

皆使鹿使犬之部當指東部而言縣境則在西部

臨江長白桓仁
撫松輯安亦同

天雪

地凍雖舍車輛而好用耙犁然多駕牛馬而不使鹿犬耙犁形狀

與橈大同小異約分二種甲種以堅固樹枝二根火熨稍曲每距離一二尺排立小柱橫以拳木加以松板可坐客三四人載貨數百觔若得良馬窮一日之力能行二三百里乙種與甲種同但不坐客不載貨專運木植故無小柱橫木板松將長八九尺徑一二尺之木或三四根或四五根均貫以鐵釘鎖以鐵練繫諸耙犁後循山崗下運一二次後雪地光而且堅馬走人行最易滑跌有與木廠訂立合同全數包運者有按日計算者包運之戶倘或少運照安東木價賠償按日計算每一耙犁約騾馬三四疋即作爲三四工趕騾馬之人亦算一工每工每日或小銀元三角或小銀元

通

化 縣 志

卷二 人民風俗 五十七

奉天作新印刷局印

四五角隨時論定（乙）騾馬吳漢槎有夏走山冬走江之詞至爲確當蓋夏雨時行道路泥濘溝水盈漲大車重載殊不易行因一律改用騾作一木架如馬鞍然惟略大所有貨物捆載架上使騾負之以行名曰馱子悉走山道以免溝水阻隔冬則地封江凍一望平坦雖新築馬路亦不能及則又舍馱子而用車輛或耙犁矣（丙）艚船山雪江冰及春融化水深流急始可通舟煤炭豆糧均在此時運載入船下駛安東求售俗呼艚子（丁）桌橙無屋不修土炕婦女終日盤坐雖飲食針黹亦在炕中於衛生最多妨害亦有方桌置於炕曰炕桌置於地曰地桌橙椅則除城鎮外山溝小

戶不易多見

鼓樂

息慎即肅慎

遼金時代有琵琶箜篌簾管大鼓腰鼓之類今則琵琶

盛行於南省箜篌或見於日本餘皆失傳惟大鼓間有用者瞽者賣卜街頭每吹短笛其聲嗚嗚與關內音調迥異豈玉關羌笛流傳至此歟俗尚不論婚嫁喪葬均用鼓樂音調亦大同小異非久居是邦驟聞其聲頗不易辨

燃料

邑亦產煤用者尚少蓋因森林區域便於取求雖長一丈餘徑一二尺之木植不惜鋸爲小段劈爲薄板車運入城到處求售近年木植漸少價值漸昂有燃燒煤炸者不待十年木植告罄煤炸

通化縣志

卷二人民風俗 五十八

奉天作新印刷局印

廣銷可以預卜

文學 民不知書子弟七八歲時父兄使之飼豕牧牛可略增加歲入以故勸令入學動輒推諉多詞自強迫教育實行風氣漸開多有送子弟入校者而國內外專門學校近亦有人焉

武事 民尚武風暇輒三五成羣入山行獵苟遇匪警不待徵召負槍爭至願作先驅前者蹶後者起從無懼色果實行徵兵制練成勁旅似尚不難

集市 每逢舊歷三六九日農人必將田間所出捆載入城陳設市中銷售俗呼趕集三日在東壩壕內大街六日在東門外大街九日

在南門外大街糧食如高糧包兒米等類銷售未盡則減價售於燒鍋即此一端舊歷之取消已非易易

盜賊 俗呼紅鬍子或云昔年多用土槍槍口有塞繫以紅絨一縷當射擊時則去其塞而啣之於口望之如生紅鬍或云當時匪人行劫多戴假紅鬍以恐嚇人或云盜匪起於吉林俄國流於罪人多在邊界往往越界勾結匪人劫掠俄人鬚多紅故以名之三說皆不知何所據土人但呼胡子蓋以胡地而稱也夏秋之間樹葉茂盛時爲最多俗謂樹葉關門又謂青紗帳起以便竄伏古稱盜爲萑蒲又曰綠林蓋即此意比年以警團得力盜賊潛踪間有外來

通化縣志 卷二 人民風俗 五十九

奉天作新印刷局印

股匪然亦罕見

語言 先哲有言我入斯土略聞語言即知情愫矧在通化五方雜處籍多魯人口操魯語出言或反真意斯露比年多匪民不安堵宜熟匪言俾易緝捕詎僅雜陳無關風土志風俗畢以語言附

土語

呖飯吃飯哈酒飲酒打腰發迹活該之應當開套耙動工火喇生氣街溜無業跑腿正身

外吃晌飯午飯耍雄狡賴毬子吝嗇秧子紉打圍行獵打凍閉門過冬串門探望親友可蠢愚陋

寒忖受辱撩啦走跑嘮科閒語瞎攔說話二虎鹵莽各路性情與不同抬扛不合語埋

態不潔趕活謀生趕火作事放山挖人趕禮送禮爽神迅速拉稀泄瀉統通總共胡咧咧

說胡老爺子之尊長老帮子老疙疸均最幼老把頭趕力羅均入山挖棒

棰挖人麻溜的迅速趕仗徒勞一大堆全體到得了能辦事鬼嚙牙黎明天奇不

趕蹚不趕及瞎扯蛋語謊打哈哈之輕謂零不丁零不丁均防不僵眼子強埋

態人污衊你掩我輕責己吃嚼焗食美打平夥均錢購食吃勞金工作花眼圈業無正

攢體已積錢磨不開對人慚愧拉花樹蜜尋蜂一骨龍總全抖起來了之形容人

老冬狗子入山稱怙老山音之仗謂扎箍扎箍治病及溜達溜達起早

攤黑勞動真踢動啦損失餂嘴抹舌的口饒鬼頭蝦蟆眼詭詐老實八脚的

說厚忠厚懈裏懈怠的怠懈隔二偏三拉裡拉忽的均疏忽紅口白牙的猶言

一個
人也

通化縣志 卷二 人民風俗 六十 奉天作新印刷局印

反語

王道凶說不善人贊美不大利行可

匪語

滑路走驕道行碰情有頂無交水官項錢上啃嘈腹均吃板山飲山串飲蹚

踹安根脫條押白息休馬刺天黑開克仗接踢筋傷受睡覺擊斃壓水設拉綫偵

上窩攏窩活窩有認打窩堵相窩打過大頁長頂天帽越

邊散解脫下幫散拉柱糾梗子山皮子狗風子馬旂子均秧子人跳子

營狗子巡樓子日央子柴火生點狗插蓬天水櫃看人順旂子藏

插旂子同摔旂子打條子同追央子綁人別亮子劫放亮子放寶蓋

子馬鞞馬踢手子馬勒馬摔手子馬鞭馬拉篇子分飄洋子水餃翻張子餅珍珠散粳飯米
馬牙散蜀黍星星散粟米啃孩草鴉吸片食

通化縣志

卷二 人民風俗 六十一

奉天作新印刷局印

宗教志

治國之道千經萬緯然揆厥要旨不外禮樂刑政兩途禮樂者禁人於未然之前刑政者施人於已然之後也然自世風不古人心嶮巇致道德不足範圍人心則道德因之而窮刑政不足勸懲人心則刑政因之愈壞此簫勺羣慝甄範衆生之神道教所以不可少也粵稽我國三代時之宗教首惟畏天故考諸傳籍凡國之興衰理亂時之災眚荒歉以暨用兵得失人事臧否幾無不歸本於天此所謂哲學時代宗教也秦漢以降釋道二教之名始立釋教以博愛普濟爲主旨道教以清淨無爲爲宗旨究其流弊雖有清談寂滅丹鼎符籙之謬傳然於叔世之人心暨人羣之交感亦不無小補我縣宗教昔時僅有釋道二教海通以來始有天主基督之流入至回教則傳屬回民他族無與焉考天主教督二教之設垂數十年然以人民拘於舊習信崇者爲數尙少茲特臚舉於後作宗教志

佛教

佛教一名釋教教祖釋迦牟尼生於吾國周靈王時父淨飯王爲北印度迦毘羅城主母摩耶夫人初奉婆羅門教喜息深林中冥求真道以未能脫除生老病死之四苦遂抱厭世主義年十九逃入雪山學道數年始得正覺遂出而說法凡四十餘年年八十示寂世稱釋迦牟尼以釋迦爲氏牟尼賢者之義其教以博愛普濟爲主旨佛滅後弟子五百人大會於王舍城編纂經典後百年佛弟子七百人又大會於毘舍離當時佛教勢力尙未出恒河流域及北印度阿育王崇拜釋氏定爲國教會僧侶千人於國都華子城且派教師傳教各國由是佛教大昌漸通化縣志

卷二 人民宗教 六十三

奉天作新印刷局印

由中亞細亞傳至葱嶺以東適東漢明帝夜夢金人遂遣蔡愔等求佛法於西域至大月氏得佛經及僧人迦葉摩騰竺法蘭以歸是爲佛教入中國之始教徒初來止於鴻臚寺遂名所居曰寺魏晉之際高句麗建國始聘西僧宏通釋典是爲佛教入遼東之始遼金元崛起北方皆崇拜釋氏滿清入關佛教與儒道同尊無賴游民多以出家爲幸事至女子出家者內典謂之比邱尼俗呼尼姑所居蘭若曰庵縣境有佛教無比邱尼自清末變法縣長潘公茂蓀深鑒僧侶多游手好閒無益社會乃將廟宇改建學堂僧侶還俗廟產改歸學田是亦佛教之一大魔劫也

道教

道教一名闡教以老子爲教祖老子姓李名耳字伯陽諡曰聃故亦稱老聃周守藏室之吏也所著道德經五千餘言亦名老子及戰國時莊周著莊子十餘萬言其要歸本於老子故後世以老莊並稱其教以清淨無爲爲宗旨漢初道教盛行如留侯辟穀欲從赤松子遊陳平曹參皆好黃老術至武帝好神仙信封禪文成五利之徒相與炫惑於是煉丹服食之說熾而道家本旨失矣後留侯八世孫張道陵復以道術相傳授子孫世守其業號爲真人其後丹鼎符籙占驗各派紛然雜出無不託之道家就中以葛洪爲最著抱朴子神仙傳等書行世從前道教

通 化 縣 志

卷二 人民宗教 六十四

奉天作新印刷局印

僅行南方北方之有道教則自長春真人至北京始真人姓邱名處機號長春子南宋人從王重陽學得先天大道元太祖召之往見於雪山以天道好生不嗜殺人爲諫太祖重之尊爲國師建長春宮居之弟子十八人隨地布教道以大顯號龍門宗今中國北部道流皆其法嗣滿清開國郭真人望氣東來預示龍飛之讖世祖入關勅建太清宮於瀋陽如元太祖長春宮故事遼東道教從此大昌教徒散居四方到處立廟本境道教最盛之時在城內有玉皇閣城南有萬寶鉞子嶺上娘娘廟二密有老爺廟均住持十餘人自清末佛教凌夷道教同受影響矣

回教

回教一名天方教教祖穆罕默德即摩訶末阿剌伯人少聰明有大志四十餘始參酌猶太基督二教別創新教曰回回教專拜造物主不信他神其經典曰可蘭經穆罕默德左手持經典右手執利劍專以武力傳教四方遂奄有阿剌伯地建大食國神權政治以教主爲元首穆罕默德卒繼其後爲教主者稱哈刺發神嗣之義哈刺發欲廣傳新教於域外西略非洲東侵波斯統一西亞細亞遣使通好於唐時中亞細亞及天山南路一帶之地以次轉入回教勢力範圍嗣後漸入中國居東省者曰東干派所居之地皆建禮拜堂曰清真寺教師曰阿訇每歲有通化縣志

卷二 人民宗教 六十五

奉天作新印刷局印

兩大麻節每七日值牛婁鬼元四宿爲主麻日主麻者禮拜之義屆期教徒咸入寺誦經祈禱其婚喪禮儀亦與他族異婚禮結婚於寺由教主立婚書乃成禮喪禮延阿訇誦經祈禱浴尸畢以白布裹之三日啓殯不具棺槨舁置壙中謂之土葬封如馬鬣形其俗禁豚肉忌煙酒食獸必反芻者取其潔也縣境回民約二百五十餘家禮拜寺建於縣城北山之麓地址高崇頗壯觀瞻云

天主教

天主教即基督教舊派一名加特力教中國人稱爲天主教教祖耶穌基督猶太人生當我國漢哀帝時（或曰漢平帝元始元年）三十歲宣

傳福音以基督自任基督者救世之義教旨在博愛教徒甚多猶太人惡之控之羅馬官吏耶穌遂死於十字架上後數百年其教風行歐洲幾遍各國當唐太宗時波斯人阿羅本賚其經典入中國太宗信之建波斯寺當時目爲景教至武宗時與佛教並禁明成祖靖難後因訪建文帝踪跡遣太監鄭和馮保通西洋天主教徒隨入中國世宗時利馬竇來華傳教大學士徐光啟首奉之清聖祖時以南懷仁湯若望佐定歷象有功許外人傳教准於通商口岸建設教堂宣宗因阿片交涉復禁傳教及文宗北狩英法聯軍入京恭親王與定條約許其在內地傳教同治初法蘭西人始傳天主教於各省而本境教堂在光緒年間成立建於本城北山之麓計房屋二十餘間當日教徒約百餘人自庚子拳匪之亂各教徒恐遭誅夷均紛紛四散遭此打擊每况愈下近因信徒太少直轄於興京教堂每年由興京派神父親查一二次但其神權尊嚴無自由平等之樂趣故人多畏之而不敢入云

耶穌教

耶穌教即基督教新派基督教原分三派曰天主曰希臘曰耶穌同以耶穌基督爲教主當十六世紀日耳曼人馬丁路得反對羅馬教皇專制乃倡宗教革命別創新教曰耶穌其教旨沿舊教而脫其桎梏教士無階級牧師得蓄妻子一時信者靡然風從而大不列顛鎮國人信仰

尤甚當時新舊教徒門戶水火迭起戰爭及近世信教自由其禍始息耶酥教在清同治時始入中國北部其傳至東省最晚本境地僻邊陲人智錮塞習俗迷信多神清光緒二十一年有英人羅約翰牧師不惜跋涉之苦徒步東來傳播福音蒞通後尤不惜巨金遂價買市房二十六間共計費銀壹百六十五兩晝夜宣講信徒頗衆復聘邢君子衡督理一切乃竭力佈道計是年受洗教友百餘名記名教友五百餘名爲基督教會極盛時代迨庚子拳匪肇亂各教友流離道路死亡泰半而教會之房間業被拳匪焚燬淨盡矣拳匪亂後時局稍靖三五同志擬從而恢復之然興工一載而會務進行亦因之停止矣

清光緒二十六年邢君子衡復承兩差會之使命遣派來通始於城內東關十字街租賃民宅五間爲臨時佈道宣講所是年春季由英國差會撥來巨款復加整頓重新修理於秋後建成瓦房三十一間除本會佔用外尙租出市房二十餘間從茲考查道理者絡繹不絕乃邢君復熱誠可欽蒙其口講指畫而潛心嚮道者不下千餘人

宣統元年邢君深鑒社會之黑暗人民智識不開而以婦女黑暗爲尤甚乃竭其私囊創設義務女學校一所復蒙縣長潘公茂蓀之襄助得成義舉該校時附設會內邢君親自教授循循善誘實心育材時學額達五十名迨民國五年邢君因勞致疾遂呈請差會謝却會務俾歸家

養疴當蒙照准然女學亦因之無款遂停辦矣

民國二年春季通化教會呈請英國差會脫離經濟關係遂在上海中華基督教總會備案請准爲中華通化基督教會每常年經費均由該本會自籌矣民國十年夏季吳木軒大夫以通埠地處寫遠人民智識簡陋憾無傳達消息之利器以灌輸之乃呈請縣長楊公子仁組織公共閱報社一處內附基督教福音堂社內訂購新聞及雜誌頗多均任人隨時參閱所有經費均由吳君一人負擔爲多且君不惜勞瘁時登臺講演公民常識道德小說社會需知一時聽者均爲之動容足徵吳君熱心社會教育福音堂內又特聘專員專講德智體美羣五育以期通化縣志

卷二 人民宗教 六十八

奉天作新印刷局印

改良社會之風化促進人民之幸福此外又聘專人講演衛生事宜每年春秋兩季施種牛痘以保兒童之發育如吳君者洵不愧宗教中之明星矣

民國十三年冬該會又聘高級神學畢業生李君興仁爲牧師李君自任職後熱心服務社會晝夜宣講不遺餘力每晚親自施行平民教育工廠教育以便貧民有所裨益故自該君到會成績頗佳迥非天主教所能及也此通化基督教沿革之大較也

慈善志

昔孔子與弟子言志曰老者安之朋友信之少者懷之孟子亦曰惻隱之心人皆有之張子曰民無同胞物吾與也程子曰一命之士苟存心於愛物與物必有所濟從可知爲聖賢者未有不以痼瘵在抱民物爲懷者也惜自三代而後世道凌夷人心日偷禍亂相尋災害時有強壯者流離於四方老弱者死於溝壑矣今日者物質文明生計偪人海宇多故兵災禍結較古時爲尤甚爰志慈善所望仁人義士皆以宇宙內事作吾人性分內事可也

通化教養工廠

通化縣志

卷二 人民慈善 六十九

奉天作新印刷局印

我縣自設治後土地寥濶故他省他縣之民徙居此地而就食者日漸增多生齒旣繁良莠不等强悍者多相率而爲盜狡黠者亦恃欺騙以爲生相習成風後患不知於胡底然懲之太過則死者不可復生處之稍寬則有恃而無恐萬全之策教養爲先此教養工廠所由設也該廠首創於潘茂蓀監督嗣因款項無着後遂停辦迨民國十二年十二月袁雨田監督力請省署繼續開辦凡曾受刑事處分不知悛改者及不事正業行爲曖昧本牌甲無人結保者並有結黨橫行強丐訛索滋擾地方者均由警甲暨區長查明報送縣署核准後勒傳入廠習藝故自創辦後感化游民無數此慈善之一也

通化救貧所

天災流行盛世不免貧困失業仁者宜憐此潘茂蓀公有鑒及此所以於民國三年而有救貧所之設也該所設於西關由地方各界捐資建築房屋三間凡老幼殘廢煢煢而無告者皆得入所內食宿倘有死亡者由公款購備棺木掩葬且於冬令嚴寒之時每人施給棉衣一套故自該所成立貧民不致無所歸此亦慈善之一也

鴉片嗎啡療養所

自鴉片流傳中國吾國上下沈湎吸食致形容憔悴家產蕩然者不知凡幾矣然自鴉片禁止私種價值日昂貧困者無力吸食遂相率而用嗎啡嗎啡之毒較鴉片爲尤烈故扎用之民皮膚潰爛形銷骨立者尤不可勝數嗚呼哀哀蒸民誰無父母嗎啡殺人竟無完膚監督潘公目睹心傷引爲隱憂遂招集地方士紳妥籌完善辦法當即議定以東關通化醫院爲療養所自民國六年成立凡有鴉片嗎啡癮者一經警甲查拏即送入該所用藥戒除根株故自該所成立黑籍人稀嗎啡癮斷此亦慈善愛民之一道也

義塚

關山難越旅櫬安歸萍水相逢掩葬無友不免骸骨流離道路而飽於狐貉犬虺之腹中矣本邑士紳及慈善大家邵公緯宸陳公銘三王公

秉藩李公在田江公鑑齋趙公少青戰公寶山解公秀岩宋公雅臣等遂發起義舉由各團體機關共捐金於縣西里許置買義地一處計五里寬長凡客籍商民及遊旅此地者倘遭死亡均可浮厝此地至無家可歸者亦可久葬此地自義塚設而民人不致暴骨於野此亦慈善之一也

忠義捐

本縣地處邊陲山深林密每值青紗幃起則胡匪猖獗各區騷擾民不得安地方警甲閭閻保障盡力殺賊故每歲陣亡者爲教頗多商農兩會除集貲爲建忠烈祠堂以旌揚其忠義外並每年撥給捐費以恤陣亡士兵家屬此舉旣足激勸忠義復能厚慰英靈亦慈善之一也

牛痘局

天花流行爲患甚烈而在小兒期爲尤甚本縣警察所長江公鑑齋爲杜絕傳染體恤貧民起見特函商通化醫院院長吳木軒君每年於春季三月中由該局施種牛痘一次純係義務不取分文故自該局成立小兒無天花危險又無痘疹之傳染此亦慈善之一也

山東同鄉慈善會

山東同鄉會成立於民國十年發起於戰寶山吳木軒宋智德諸公因通化境內商民半多魯籍故組織此會以重鄉誼而謀公益也初舉吳

木軒姜耀德兩公爲會長繼任會長則舉戰寶山史長勝乃成立慈善會舉宋雅臣李曉峯等爲董事曲允普孫寶堂等爲幹事舉宋智德毛兆濱等爲調查員並成立小學兩級舉戰廣仁爲校長附設商人養病所勸募救濟難民旅店捐款若干真所謂急公好義見義勇爲者也

僑民志

慨自海禁大開重洋咫尺陸路則有黑煙繚繞之便水運則有飈輪疾轉之捷是以他邦之商旅接跡而來我華域者不可枚舉故通都大邑則有領事使館之設商埠海港則有租界居留之別我通僻處東陲交通不便歐美各邦人士足跡罕到首至斯土者則爲俄人俄人去後日人繼而踵至焉迨日人吞併朝鮮鮮民困於生計故多流竄通境墾種以爲生今日者生齒日繁交際益蹟雖曰非我族類其心必異然處此大同世界固不必以畛域之分致釁自我開也爲今之計對於僑民宜相見以誠相待以禮務宜大東亞之提携敦世界之親睦用本此旨以志僑民並以韓僑表附焉

駐通化日本領事分館

日本領事分館之設所以保護韓僑辦理國際交涉也在通化組織之始爲民國六年二月當設在東門外大街復遷移南江沿租賃鴨綠江採木公司通化分局地址俟因八道江局改駐通化該館乃於民國十四年春移居南關係租賃民宅館內設領事一人關於中日兩側交涉事屬之署長一人關於巡查事屬之設部長一人關於外巡偵訪等事屬之部長以下設繙譯書記官一人巡捕長一人巡捕四人至興京桓仁兩縣毘連通境韓僑已日漸增多故兩縣均設日本出張所惟興京

通化縣全境韓僑戶口調查表 十五年份調查

區別	戶數		韓僑人數		男女未成丁口數		職業	
	男	女	男	女	男	女	職	業
一區	一〇八	二九八	二〇一	四九九	一二五	一一八	商	農
二區	七三	一八二	一五九	三四一	五四	六一	全	全
三區	一四〇	四四七	三二七	七六四	一〇二	九〇	全	全
四區	四六五	九四七	八一七	一七六四	一八二	三一九	全	全
五區	五二八	一、六五	一、二四三	二、八六八	五二三	五四二	全	全
六區	二六八	八〇〇	六四八	一、四四八	二二一	一七六	全	全
七區	四四	一三三	一〇六	二三八	三五	四〇	全	全
八區	六〇	一九二	一四八	三四〇	四一	四〇	全	全
警察所	九	二三	一九	四二	五	五	商	商
合計	一、六九五	四、六三六	三、六五八	八、二九四	一、二七八	一、三九一		

通化縣志

卷二人民僑民 七十五

奉天作新印刷局印

按全境韓僑業農者十居七八業商者十居二三農民多種
稻商民多以理髮造紙刻字爲事業

明說